

01/03/2003

Tommy mampu beri saingan

Zairee Zahir

PASUKAN Jaseri Racing berharap penampilan sulung dengan sentuhan anak watan dalam saingan Kejuaraan Porsche Carrera Piala Asia dalam saingan Asian Festival of Speed (Afos) musim ini dapat membawa pasukan ke podium.

Pengerusi Jaseri Racing, Datuk Mokhzani Mahathir, berkata dengan mempertaruhkan pengalaman juara Kejuaraan Satria GTi 2002, Tommy Lee, pasukan itu yakin mampu memberi saingan bermakna di peringkat Asia dan merencanakan lagi sukan permotoran negara.

Dalam majlis pelancaran pasukan itu di ibu kota semalam, Mokhzani berkata sebagai pasukan baru, Jaseri Racing berharap membuat kemunculan bermakna pada pusingan pertama di Litar F1 Sepang ketika perlumbaan Formula Satu Grand Prix Malaysia Petronas 2003, 21-23 Mac ini.

"Sasaran kami adalah ke pentas pemenang tetapi kami akur sebagai sebuah pasukan baru, banyak rintangan yang mungkin terpaksa dihadapi.

"Namun dengan spesifikasi standard yang ditetapkan penganjur, pengalaman 15 tahun sebagai pemandu, Tommy sebagai pemandu kereta saloon, pengalaman memandu Porsche di kejuaraan Merdeka Millenium Endurance tahun lalu serta kecekapan krew bakal menjadi penentu untuk memberikan keputusan positif kepada kami," katanya dalam sidang akhbar, semalam.

Turut hadir Pengerusi Transmile Group Berhad, Gan Boon Aun. Transmile adalah salah satu penaja utama dalam pasukan itu.

Kejuaraan Porsche Carrera Piala Asia musim ini menyaksikan lapan pusingan termasuk dua di Litar F1 Sepang, Litar Pasir Gudang, Indonesia, Thailand, Korea Selatan, Macau dan Zhuhai di China.

Mokhzani begitupun sedar, Jaseri bakal menerima tentangan sengit daripada 17 penyertaan lain termasuk dua pasukan yang menurunkan dua pemandu. Antara yang dilihat menjadi penghalang kepada Tommy ialah rakan sepasukannya ketika Merdeka Milleneum Endurance lalu, Nigel Albon dari Britain dan jaguh Hong Kong, Charles Kwan.